

JEUNE TIM DIEGO

# Hivory ao amin'ny TIKO Place Kabaro ny alahady ho avy izao

A nisan'ny mandray anjara amin'ny fanetsehana ny fototry ny antoko Tiako i Madagasikara (TIM), ny tanora, na ny Jeune TIM Diego any amin'ny faritra Diana. Mamelon-maso ny antoko ihany koa izy ireo, amin'izao volana maromaro mialohan'ny fifidianana ho filohampirenena ho avy eto amintsika izao. Ankoatra izany, manao asa sosialy sy fampandrosoana any amin'ny renivohitry ny faritra Diana ihany koa ireto tanora TIM any an-toerana ireto, toy ny fandraisana anjara tamin'ny fanadiovana tanàna, ny fambolena-kazo ho fiarovana ny tontolo iainana any an-toerana. Ho fanamafisana hatrany ny fifandraisana eo amin'ireo mpikambana, sy ho fiantsoana mpikambana vaovao, hivory ao amin'ny Tiko Place Kabaro any Antsiranana ny Jeune TIM Diego ny alahady tolakandro ho avy izao, hanomboka amin'ny 3 ora. Araka ny nambaran'ny mpikarakara, maro ny laha-dinika amin'izany, indrindra ny mahakasika ny raharaham-pirenena amin'ny ankapobeny amin'izao fotoana, sy ny fampitana ny toroma-



Ny sasany amin'ireo mpitarika ny Jeune TIM Antsiranana. rika avy amin'ny antoko TIM foibe.

Isambilo

Raharaham-pirenena

## Fitondrana lany andro mamorona zavatra atao môdely

Tsy amin' izao fitondrana Rajoelina izao velively no fotoana hampisandrana an'i Madagasikara. Manaporofo izany ny fahitana ny fomba fiasany, na tamin'ny andron'ny tetezamina, na indrindra amin' izao izy eo amin'ny fitondrana efa efa-taona izao. Resaka fe resaka ka atao ny amin'ny drafitra fisandratana i Madagasikara, fa io tsy vitan'ny vava sy kajikajy ambony latabatra miampy ny fanofinofisana fotsiny eo. "Apetraho amin'ny tany ny tongotra aloha", hoy ny profesora Jonah Ratsimbazafy, manam-pahaizana manokana ambony momba ny varika vao tsy ela izay. Misy ihany koa ny miteny ny olom-pirenena hafa hoe: ny tokonana tsy afaka ka ny rindrina no tadiavina hianihana. Efa lesona be izany ho an'ny fitondrana raha toa ka manan-tsofina entina mihaino ihany. Ny mampianahy ny olom-pirenena



Ny lohany mihitsy no matsatso amin'ny fitondrana misy amin'izao fotoana.

maro, dia amin'ny fahadi-soana amin'ny zotran-dalana hitondrana ny firenena sy ny ho endrika hita, na ankehitriny na aoriana kely, raha araka ny tetikasan'ny fitondrana. Ho tsara ivelany fotsiny, fa ny ao anatiny hanahirana ny maso ny hahita azy. Mety hamirapiratra ivelany fotsiny, fa ny fiainan'ny sarambambem-ba-

hoaka anaty haizina tanteraka. Ratsy tsotra izao izany sary izany ary tsy mendrika ny firenena sy vahoaka malagasy. Efa ratsy laza ihany ny firenena noho ny fanapahan-kevitra sasantsasany, raisin'izao fitondrana izao hatrany tamin'ireo sehatra isan-karazany. Misy aza ny sasany ihomehezan'ny any ivelany indrindra ireo firenena afrikana. Anisan'izany ny filazana fa i Madagasikara hanao ho firenena môdely aty Afrika sy indrindra aty amin'ny ranomasimbe Indiana; hanondrana vary sy vokatra hafa, sns... Dia izao indray koa mamorona vaovao ka milaza ny amin'ny karibaona manga. Hatreto aloha tsy mbola nisy na iray aza tamin'ny nambara no tantaraka mazava niarahany sy nampiaiky ny firenendrehetra maneran-tany, fa tena môdely amin'izany i Madagasikara. Moa tsy lasa henatra ho an'ny fire-

neny ve izany? Ny hanahirana dia homen'ny olona toerana tsy mendrika azy intsony ny Malagasy any aoriana kely, sanatria ho very hasina, hihatsaram-belatsihy fotsi- ny noho ny lafiny diplômasia. Asa raha mitady amboara amin'ny famorona- na sehatra atao môdely toy izany ihany koa izao fitondrana izao, toy ilay resaka indostria niteraka resabe teto amin'ny firenena? Te hiseho hiavaka amin'ny rehetra kanefa toa ilaozan'ny rehetra lavitra amin'ny sehatra fampandrosoana, sy fana-tsarana ny fiainam-bahoaka. Firifiry akory ny olam-bahoaka niainana ela izay, fa tsy hita izay fivahany hatreto. Zavatra hafa hatrany no imokomokoana atao ho familian-dalana ny saim-ba- hoaka tsy hifantoka amin' ny fahoriana mianjady aminy.

Sôh'son

Taksi moto

## Mampianatra ny olona tsy hanara-dalàna i Hajo

Nitaingina taksi-motomaly ny filohan'ny antoko MMM: Malagasy Miara-Miainga, Hajo Andrianainarivelo, izany fihetsika izany raha ny fahitan'ny maro azy dia tsy fanarahan-dalàna, satria tsy nanao aroloha izy, ny taksi- moto ihany koa dia azo lazaina ho mbola tsy tena ara-dalàna eo imason'ny rehetra, na efa nahazo fankatoavana tao anivon'ny filankevitry ny tanànan'Antananarivo aza. Nanambara ity mpanao politika ity tao amin'ny pejy facebook-ny, fa tsy maintsy nandeha izany taksi- moto izany ny tenany, satria tratra aoriana tamin'ny fotoana izay tokony ho vonjeny hono, ka tsy maintsy nandray an'ity



Ny filohan'ny antoko MMM nitaingina taksi-moto.

karazam-pitaterana ity, voalaza ihany koa fa kely loatra ny aro loha nomena azy, ka tsy tafiditra, izay no antony tsy nanaovany izany aroloha izany, izay tena tsy fanarahan-dalàna. Olona tokony ho fitaratra no mampianadratsy olona tsy hanara-

dalàna. Misy aza moa ireo naneho hevitra momba izay fihetsika izay, fa tena tsy mendrika ity mpanao politika ity, mikasa ny hirotsaka ho fidiana ho filoham-pirenena, nefa mampianatra ny olona tsy hanaraka ny fepetra misy sahady. Midika koa izany, fa miray tendro tokoa ny ben'ny tanàna Naina Andriantsitohaina sy ny filohan'ny MMM Hajo Andrianainarivelo: ny ben'ny tanàna mankasitrika ny isan'ny taksi moto eto Antananarivo, i Hajo koa nitaingina ity fitaterana kodiaran-droa ity, ka toa manamarina ny ahiahy nisy izany amin'ny fiarahan'izy ireo amin'ny sehatry ny politika.

Stefa

### Ny Valosoa sy fakafaka

## Fikarakarana fifidianana Hahapotika ny firenena ny ahiahy mitoetra

Hiafara aiza ny ahiahy tsy ihavanana eo amin'ny fanomanana sy ny fikarakarana fifidianana ? Samy milaza sy maneho ny heviny sy ny fijeriny momba izany avokoa ny ankamaroan'ireo hery velona eto amin'ny firenena, indrindra ny avy amin'ny mpanohitra, ary eo ihany koa ny firaisamonim-pirenena. Nahariharin'izy ireo ny lesoka hatrany am-panombohana amin'ny fanomanana, ka nasongadiny ny eo amin'ny fanisana ny mpifidy isam-pokontany. Raha ny hita eny ifotony anefa hatreto, dia tsy misy ny ezaka na finiavana amin'ny fanovàna ny fomba fiasa amin'izany. Ny tsikaritra, miziriziry mitrifana miroso hatrany mankany amin'izay toe-javamisy be mpakiana izay ny fitondrana, sy ireo rantsamangaika rehetra mifandray amin'izany fifidianana izany. Ny fikaonandoham-pirenena nanaovan'ireo avy amin'ny fanoherana sy ny firaisamonim-pirenena aza, zary antso an'efitra na niantefa tamin'ny bemarenina, ka tsy nasian'ny fitondrana vidiny. Inona no hiafaran'izany tsy firaharahiana ny hafa izany sy ny fiheverana mihitsy izany ho fitadiavan-tseza fotsiny ihany, raha ny fahitan'ny eo anivon'ny fitondrana azy ?

Ho an'ny mpandinika sy mpamakafaka, dia hampianahy ny hoavin'ny firenena manoloana izao zavamisy amin'ny fihetsiky ny fitondrana, sy ireo rantsamangaika samihafa mifandray amin'ny fifidianana izao. Tsy hahasoa ny firenena izao toe-javatra izao. Ho ankinina amin'iza ny tompon'andraikitra ? Tokony hipetraka mazava tsara ho voarakitra antsoatra ny olona miziriziry amin'ny heviny toy izao, fa tsy mba mihevitra ny hafa. Iaraha-mahalala tsara mantsy, fa ny nampandroso ny firenen-kafa maro samihafa nandalo olana, dia nisoroka ny tsy hiverehan'ny olana nitranga tao aminy ary samy nampirina ny hambopony avy ary nifanatona nidinika. Ohatra mivaingana amin'izany ny tao Rwanda, izay nisian'ny adim-poko faratampony kanefa efa nilaozany ela ny fototry ny disadisam-piarahamonina tao aminy. Vao nanome lesona ny firenena afrikana maro amin'ny firaisan-tsaina izay hahasoa ny firenena ny tao Côte d'Ivoire, fa zary volon-gisa tsy mandray rano izany aty Madagasikara. Midehaka anefa sy manao angoan-tenda ery fa ho hatao môdely ho an'i Afrika sy aty amin'ny ranomasimbe indiana ity firenena ity. Ny ahiana hitranga anefa dia hifanohitra amin'izay, fa na ny firenena izay nambara ho ampiana aza izao, ho ampindramina vola, handroso lavitra noho i Madagasikara. Efa manomboka miseho izany tato ho ato. Ka ilay fampandrosoana eto amin'ny firenena mandrorona be ihany, satria noho ny fitondrana miseho hahavita tena irery, ary manilika ny hafa indrindra ireo tsy mitovy hevitra na fijery aminy. Dia izao efa iainan'ny sarambambem-bahoaka amin'ny fahasahiranana sy fahantrana izao ny vokany, ary mbola hiha-mafy aza izany miditra amin'izao fiakaran'ny taona izao.

Sôh'son

### PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue. Remerciements au Sacré Cœur pour faveurs obtenues.

Hanta R.